



神僧傳卷第五

普明

釋普明本名法京。俗姓朱氏。會稽人。少小志操有異。有僧乞食。因勸云。郎子既有善性。可向天台山出家。其中有初依菩薩在彼說法。遂以陳太建十四年。踰山越澗。來入天台。正值智者處坐說法。智者笑云。宿誓願力。今得相遇。隨智者往荊州玉泉寺。每於泉側。練苦專思。智者反路台峰。令造大鍾。天台供養。江陵道俗。競為營造。當欲鑄時。盲人來看。明懸鑿機。知相不吉。果爾開模。鍾便破缺。後還國清。所住之房。去水懸遠。房頭空地。純是礪石。仍懷念曰。若令此石出水。豈不快乎。言竟。數日石中泉溜。周給東西。國清精舍。隋高帝置立。明以講堂狹



小欲毀廣之。共頂禪師商量。頂勸勿改。有括州都督周孝節。遙聞此事。即施杉桂。泛海送來。頂向赤城。感見明身長一十餘丈。高出松林之上。翼從數十許人。語頂曰。兄勿苦諫。事願尅成。頂知神異。合掌對曰。不敢更諫。一依仁者。豎堂之日。感動山王。晨朝隱軫。狀若雷震。摧樹傾枝。闊百步許。自佛龕下。直到於寺。至于日沒。還返舊蹤。砰砰磕磕。勢若初至。又願共道俗造堂殿。金銅盧舍。那像坐身丈六。時有一人。稱從漕溪村來。施金十一兩。用入像身。問其姓名。終不肯說。禮拜辭退。周訪彼村。無人識者。又比房侍者。恒聞房內共人語話。陰伺察視。不見別形。所聽言音。唯勸脩善。既而化緣就畢。大漸時至。清晨呼諸弟子曰。夫人壽命不可常保。汝等宜知。便自脫新淨之衣。著故破者。換衣纔竟。奄然就滅。

### 玄光

釋玄光者。海東熊州人也。少而穎悟。往衡山見思大和尚。後返錫江南。屬本國舟艦附載。離岸時。綵雲亂目。雅樂沸空。絳節霓旌。傳呼空中。聲云。天帝召海東玄光禪師。光拱手避讓。唯見青衣前導。少選入宮城。且非人間官府羽衛之設也。無非鱗介參雜鬼神。或曰。今日天帝降龍王宮。請師說親證法門。吾曹水府蒙師利益。既登寶殿。次陟高臺。如問而談。略經七日。然後王躬送別。其船泛洋不進。光復登船。船人謂經半日而已。光歸熊州。翁山卓錫。結茅乃成。梵刹。厥後罔知攸往。

### 明達



釋明達。姓康氏。其先康居國人也。童稚出家。嚴持齋戒。年及具足。行業弥峻。脇不著席。日無再飯。外儀軌則。內樹道因。廣濟為懷。遊行在務。以梁天監初。來自西戎。至于益郡。時巴峽蠻夷。鼓行抄劫。州郡徵兵。克期誅討。達愍其將苦。志存拯拔。獨行詣賊。登其堡壘。慰喻招引。未狎其情。俄而風雨晦冥。雷霆震擊。群賊驚駭。惻尔求哀。達乃教具千燈。祈誠三寶。營辦始就。昏霾立霽。山澤通氣。天地開朗。翕然望國。並從王化。遂使江路肅清。往還無阻。後因行役。中路逢人縛豚在地。聲作人語。曰。願上聖救我。達即解衣贖而放之。嘗於夜中索水洗足。弟子如言而泥。竟不脫。重以湯洗。如前不去。乃自以水灌之。其足便淨。達曰。此魚膏也。更莫測其所從行。至梓州牛頭山。欲搆浮屠。及以精舍。不訪材石。直覓匠工。道俗皆恠其言。于時三月水竭。即下求木。乃於水中得一長材。正堪剝柱。長短合度。僉用欣然。仍引而豎焉。至四月中。涪水大溢。木流翳江。自泊村岸。都無溜者。達率合道俗。通皆接取。從橫山積。創脩堂宇。架塔九層。遠近併力。一時繕造。役不逾時。欵然成就。而躬襲三衣。並是簾布。破便治補。寒暑無革。有時在定。據于繩床。赫然火起。眾往撲滅。唯覺清涼。有沙門僧救者。積患孿臂。來從乞瘥。達便授杖。令行不移晷景。驟步而返。又布薩時。身先眾坐。因有偷者穿牆負物。既出在外。迷悶方所。還來投寺。遂喻而遣之。天監十五年。隨始興王還荊州。冬十二月。終于江陵。



釋道舜。未詳何許人。靜處林泉。庇道自隱。言常含笑。談述清遠。嘗止澤州羊頭山神農定藥之所。結宇茅茨。餘無蓄積。日唯一食。常坐卒歲。感蛇鼠同居。在繩床下。各孚產育。不相危惱。又致虎來蹲踞其側。便為說法。有人還住。告虎令去。或語之云。明日人來。汝不須至。便如舜言。虎便不現。給侍之人。與庖同住。親如家犬。曾莫之畏。身著弊納。略無可採。跣行林野。不擇晨夕。開皇初。忽遊聚落。說法。化諸村民。皆盛集受法。獨不為一女受戒。告云。汝當生牛中。其相已現。戒不救汝也。業不定者。爾乃相濟耳。時有不信其言。以為惑眾。咸有疑者。舜欲決於眾議。告眾曰。必不信者。試躡汝牛尾。業影必當不起。即以足躡女裙後空地。云是尾影。其女依言。趣起不得。時眾驚信。請舜曰。如何除此業報。其女家積粟數萬石。既懼惡業。一時頓捨。舜並為營福。令其懺悔。如此累作惡業。便傾方為受戒。或依諸癘村。受於癘供。見有膿潰外流者。皆口就而啖之。情無惡念。或洗其衣服。或淨其心業。用為己任。情向欣然。初無蟬感。後遊於林慮洪谷。北詣晉盤亭等諸山。隱寺綜禪之業。不測所終。

道仙

釋道仙。一名僧仙。本康居國人。初以遊賈為業。後值僧達禪師。為其說法。遂沉寶船於江。辭妻子。投灌口竹林寺。而出家焉。初落髮日。對眾誓曰。不得道者。不出此山。即迴絕人蹤。結宇巖曲。禪學之侶。相次屯焉。每覽經卷。



始開見佛在某處無不哽咽。我何不值。但見遺文。而仙  
挺卓不群。野栖禽獸。或有造問學方者。皆答善權。冥符  
正則。自初入定。一坐則以四五日為恒。准客到其門。潛  
然即覺起。共接晤。若無人往。端坐靜室。寂若虛空。有時  
預告。明當有客至。或及百千。皆如其說。曾無欠長。梁始  
興王澹。褰帷三蜀。禮以師敬。攜至陝。于時道館崇敞。巾  
褐紛盛。厲相呵斥。甚寄憂心焉。仙乃晏如。曾無所屑。一  
夕道士忽見東岡火發。恐野火焚害仙也。各執水器來  
救。見仙方坐大火中。猛焰洞然。咸嘆火光神德。道士李  
學祖等捨田造像。寺塔欵成。遠近歸信。十室而九。州刺史  
鄱陽王恢躬禮受法。天監末。始興王真感於梁泰寺  
造四天王像。每六齋晨常設淨供。仙後赴會。四王頂上  
放五色光。仙所執爐。自然焰發。太尉陸法和昔微賤日。  
數載在山。供仙給使。僧有肆責者。仙曰。此乃三台貴公。  
何緣辱罵。時不測其後貴也。和果遂昇袞服。仙或勞疾。  
見縹衣童子從青溪水出。椀盛妙藥。跪而進服。無幾便  
愈。居山二十八年。復遊井絡。化道大行。時遭酷旱。百姓  
請祈。仙即往龍穴。以杖扣門。數日。衆生何為嗜睡如此。  
語已。登即玄雲四合。大雨滂注。民賴斯澤。咸來禱賽。欽  
若天神。有須舍利。即為祈請。應念即至。如其所須。隋蜀  
王秀作鎮岷絡。有聞王者。尋遣追召。全不承命。王勃然  
動色。親領兵仗。往彼擒之。必若固縱。可即加刃。仙聞兵  
至。都無畏懼。索僧伽黎披已。端坐念佛。王達山足。忽雲  
雨雜流。雹雪崩下。水涌滿川。蔽軍無計。事既窘迫。乃遙



歸懺禮。因又天明雨霽。山路清夷。得至仙所。王躬盡敬。便為說法。重發信心。乃邀還成都之靜衆寺。厚禮崇仰。舉國恭敬。號為仙閣梨焉。開皇年中。返于山寺。道路自淨。山神前掃。年百餘歲。端坐而卒。

### 法安

釋法安。姓彭氏。安定鶉孤人。少出家。在太白山九隴精舍。慕禪。為業。糲食弊衣。卒于終老。開皇中。來至江都。令通晉王。時以其形質矬陋。言笑輕舉。並不為通。日到門首。喻遣不去。試為通之。王聞召入。相見如舊。便住慧日寺。王所遊履。必資隨後。及駕幸泰山。時遇渴乏。四顧唯巖。無由致水。安以刀刺石。引水崩注。用給帝王。時大嗟之。問何力耶。答王力也。及從王入沙磧。達于泥海中。應遭變。皆預避之。得無損敗。後往泰山神通寺。僧來請檀越。安為達之王。乃手書寺壁。為弘護也。初與王入谷。安見一僧著弊衣。乘白驢而來。王問何人。安曰。斯朗公也。即創造神通。故來迎引。及至寺中。又見一神。狀甚偉大。在講堂上。手憑鷗吻。下觀人衆。王又問之。答曰。此太白山神。從王者也。尔後諸奇。不可廣錄。至十一年春。四方多難。無疾而終。所住春秋九十八。

### 智顛

釋智顛。字德安。姓陳氏。潁川人也。母徐氏。夢香烟五彩。縈迴在懷。欲拂去之。聞人語曰。宿世因緣。寄託生道。福德自至。何以去之。又夢吞白鼠。如是再三。恠而卜之。師曰。白龍之兆也。及誕育之夜。室內洞明。信宿之間。其光



乃止。忽有二僧扣門曰：善哉！兒德所重，必出家矣。言訖而隱。年十八，投湘州果願寺沙門法緒而出家焉。一日因說禪門，用清心海。語默之際，每思林澤，乃夢巖崖萬重，雲日半垂其側，滄海無畔，泓澄在于其下。又見一僧搖手伸臂，至于岐麓，挽顛上山。顛以夢中所見，通告門人。咸曰：此乃會稽之天台山也。聖賢之所託矣。先有清州僧定光，久居此山，積四十載，定慧兼習，蓋神人也。顛未至二年，預告山民曰：有大善知識當來相就，宜種豆造醬，編蒲為席，更起屋舍，用以待之。顛往天台，既達彼山，與光相見，即陳賞要。光曰：大善知識，憶吾早年山上搖手相喚不乎？顛驚異焉，知通夢之有在也。又聞鍾聲滿谷，衆咸恠異。光曰：鍾是召集有緣，尔得住也。顛乃卜

居勝地，是光所住之北。佛壟山南，螺溪之源，處既閒敞，易得尋真。地平泉清，徘徊止宿。俄見三人，皂幘絳衣，執疏請云：可於此行道。顛後於寺北華頂峯，獨靜頭陀。大風拔木，雷霆震吼，螭魅千群，一形百狀，吐火聲叫，駭畏難陳。乃抑心安忍，湛然自失。又患身心煩痛，如被火燒。又見亡歿二親，枕頭膝上。陳苦求哀，顛又依止法忍，不動如山。故使強軟兩緣，所感便滅。忽致西域神僧，告曰：制敵勝怨，乃可為勇。每夏常講淨名，忽見三道寶階，從空而降，有數十梵僧乘階而下。入堂禮拜，手擎香爐，遶顛三匝。久之，乃滅。於當陽縣玉泉山立精舍，勅給寺額，名為一音。其地昔唯荒嶮，神獸蛇暴。創寺之後，快無憂患。是春亢旱，百姓咸謂神怒。顛到泉源，帥衆轉經，便感



雲興雨注。虛謠自滅。晉王蕭妃疾苦醫治無術。王遣開府柳顧言等致書請命。願救所疾。顓又率侶建齋七日。行金光明懺。至第六夕。忽降異鳥。飛入齋壇。宛轉而死。須臾飛去。又聞豕吟之聲。衆並同矚。顓曰。此相現者。妃當愈矣。鳥死復蘇。表蓋棺還起。豕幽鳴顯。示齋福相乘。至于翌日。患果遂瘳。開皇十七年十一月二十四日。端坐如定而卒於天台山。大石像前。春秋六十有七。

智曠

釋智曠。姓王氏。初母將孕。夢入流浴。童子乘寶船來接。便覺有娠。及生長。敏而重行。梁末為壯士。後離俗從道。學長生術。及值高僧授戒為佛弟子。德行動人。漸示潛迹。江陵張詮者。二世眼盲。曠曰。尔家塚內棺枕古井。移墳開甃。必獲襪焉。因即隨言。瞽者見道。請求剝落。衆咸憚之。便伐薪施僧。空閑靜慮。又言澗有古鍾。可掘出懸寺。仁州刺史謂為詭惑。鞭背百下。無慘無破。便送出臺。拘在尚方。有力者試以八尺棊懸來。捶膝。傍觀謂言糜碎。而曠容既無撓。肉亦無痕。獄吏云。承居士能忍飢。便絕食七日。身色如故。市衢見行。驗獄猶有方信分身。大定三年。後人乞草屨。今夜當急行。及三更。合城火發。四門出。人不泄。燒殺七千。曠在獄。引囚二百。安步而出。年將不惑。始蒙剝落。進戒以後。頭陀蛇弭床側。每夕山隅。四燈同照。士俗雲赴。奄成華寺。有一宰鴨而為齋者。鴨神夜告。便曰。何有殺牲而充淨供。自尔便斷。曾度夏水。徒侶數十。欲住不可。欲去無從。前岸兩船。無人將至。曠笑。



而舉聲呼之。船自截流直到。遂因濟水。誠以勿傳。又於咸陽造佛迹寺。有牛產犢。出首還隱。已過信次。母將亡。僧告曠。知。惻。答曰。此犢是寺居士。侵用僧物。今來償債。其羞不出。牛母無他。因執爐呵戒。犢子疾當償報。何耻生乎。應言便出。神異冥徵。不可備載。以開皇二十年九月二十四日。終於四望開聖寺。自剋終期。天香滿室。合寺音樂西南而去。

### 法充

釋法充。姓畢氏。九江人。常誦法華。并讀大品。其遍難紀。兼繕造寺宇。情在住持。未住廬山半頂化城寺。脩定。自非僧事。未嘗妄履。每勸僧衆。無以女人入寺。上損佛化。下墜俗謠。然世以基業事重。有不從者。充歎曰。生不值佛。已以罪緣。正教不行。義須早死。何慮方土。不奉戒乎。遂於此山香爐峰。自投而下。誓粉身骨。用生淨土。便於中虛。頭忽倒上。冉冉而下。處于深谷。不損一毛。寺衆初不知也。後有人上峯頂。路望下千有餘仞。聞人語聲。就而尋之。乃是充也。身命猶存。口誦如故。迎還至寺。僧感其死諫。為斷女人。經于六年。方乃卒世。時屬隆暑。而屍不臭爛。香如爛瓜。即開皇之末年矣。

### 慧侶

僧慧侶。曲阿人也。住蔣州大歸善寺。靈通幽顯。世莫識之。而翹敬尊像。事同真佛。每見立像。不敢輒坐。勸人造像。唯作坐者。後往嶺南脩禪法。大有悟解。住栖霞時。嘗往揚都謁德法師。德異禮接之。將還山。德請現神力。侶即



從窓中出。解齊熙寺佛殿上額。因語僊云。世人無遠識。見多驚異。故吾所不為耳。大業元年。終於大歸善寺。初。僊終日。以三衣還衆僧。吾今死去。徒衆好住。便還房內。大衆驚起。追之。乃見房中白骨一具。跏坐牀上。撼之。鏘然不散。

### 法喜

釋法喜。南海人也。形容寢陋。短弱迂踈。可年四十許人。嶺表耆老。咸言兒童時見識之。顏貌如今無異。蠻蜒音間相傳云。已三百歲矣。亦自言舊識廬山遠法師。說晉宋朝事。歷歷如信宿前耳。平素時。悄默無語。語必含深意。吉凶之徵。有如影響。人亦不欲與喜相見。懼直言灾惡。忤逆意也。陳朝馬靜為廣州刺史。方上任。喜直入州上廳。事畫地作馬頭形。以示其子而去。靜本名族。多武畧。到州。行部。從甲士數萬。旌旗劔戟。以威邊徼。其侈僭過度。被人誣告謀反。帝使臨汝侯按之。利其財產。擒而斬之。此畫地之明効也。喜之先見。皆此類。煬帝聞之。取來揚州。帝令宮內安置。于時內造一堂。新成。師忽昇堂觀看。因驚走下階。迴顧云。幾壓殺我。其日中夜。天大雨。堂崩。壓殺數十人。其後又於宮內環走索羊頭。帝聞而惡之。以為狂言。命鑊著一室。數日三衛於市見喜。坦率遊行。還奏云。法喜在市。敕責所司檢驗。所禁之處。門鎖如舊。守者亦云。師在室內。於是開戶入室。見架梁覆一聚白骨。鎖在項骨之上。以狀奏聞。敕遣長史王恒驗之。皆然。帝由是始信非常人也。敕令勿驚動。至日暮。師還



室內。或語或笑。守門奏聞。敕所司脫鎖。放師出外。隨意所適。其後帝遇弒於江都。方悟索羊頭之驗。有時一日之中。凡數十處齋供。師皆赴會。在在見之。其間亦飲酒。斃肉。俄而見身有疾。常卧床。去薦蓆。令人於床下鋪炭。火甚熱。數日而命終。火炙半身皆焦爛。葬於香山寺。至大業四年。南海郡奏云。法喜師見還在郡。敕遣開棺視之。則無所有。

### 普安

釋普安。姓郭氏。京兆涇陽人。小年依圓禪師出家。苦節頭陀。晚投藹法師。通明三歲。常業華嚴。誦讀禪思。唯為標擬。周氏滅法。栖隱于終南山之榎梓谷。時有重募。捉獲一僧。賞物十段。有人應募來欲執安。即慰喻曰。觀卿

貧煎。當欲相給。為設食已。俱共入京。帝語此人曰。我國法急。不許道人民間。你復助急。不許道人山中。若爾遣他何處得活。宜放入山。不須檢校。於是釋然。復歸。隋文創曆。佛教大興。廣募遺僧。依舊安置。時榎梓一谷三十餘僧。應詔出家。並住官寺。唯安依本山居。守素林壑。時行村聚。惠益生靈。末有人於子午虎林兩谷合澗之側。鑿龕。結菴。延而住之。初止龕日。上有大石。正當其上。恐落。掘出。遂峻崩下。安自念曰。願移餘處。莫碎龕窟。石遂依言。迸避餘所。大眾共恠。安曰。華嚴力也。未足異之。又龕東石壁澗。左有索陀者。川鄉巨害。縱橫非一。陰嫉安德。恒思誅殄。與伴三人。持弓挾刃。攘臂挽強。將欲放箭。箭不離弦。手張不息。努眼舌噤。立住。經宿。聲相通。震遠。



近雲會鄉人稽首歸誠請救。安曰：素了不知，豈非華嚴力也。若欲除免，但令懺悔。如語教之，方蒙解脫。又龕西魏村張暉者，夙興惡念，以盜為業。夜往安所，私取佛油，羸受五升，背負而出。既至院門，迷昏失性。若有所縛，不能動轉。眷屬鄉村同來為謝。安曰：余不知，蓋華嚴力乎。語令懺悔，扶取油羸。如語得脫。又龕南張卿者，來盜安錢，袖中持去。既達家內，寫而不出，口噤無言。即尋歸懺，復道而返。有程郭村程暉和者，頗懷信向。恒來安所，聽受法要。因患身死，已經兩宿，纏屍於地。同欲棺殮。安時先往鄆縣，還還在道。行達西南之德行寺東，去暉村五里。遙喚程暉和，何為不見迎耶。連喚不已。田人告曰：和久死矣，無由迎也。安曰：斯乃浪語，吾不信也。尋至其村。

厲聲大喚，和遂動身。旁親乃割所纏繩，令斷。安入其庭，又大喚之。和即偃起，匍匐就安。令屏除棺器，覆一筍笠。以當佛座。令和遶旋，尋復如故。更壽二十許歲。後遇重病，來投乞救。安曰：放爾遊蕩，非吾知也。便遂命終。昆明池北白村老母者，病卧床枕，失音百日。指撫男女，思見安形。會其母意，請來至宅。病母既見，不覺下迎。言問起居。庵同常日。遂失病所在。于時聲名更振。村聚齊集，各率音樂，迎家告令。欲設大齋。大坊村中田遺生者，家徒壁立。而有四女，妻著弊布，齊膝而已。四女赤露。大女名華嚴，年已二十。唯有簾布二尺，擬充布施。安引村眾，次至其門。愍斯貧苦，遂度不入。大女思念，由我貧煎，不及福會。今又不脩，當來倍此。周遍求物，聞爾無從，仰面悲



踰遂見屋甍一把亂床音迷用塞明孔。挽取抖揀得穀十餘。按以成米。并將前布擬用。隨喜。身既無衣。待至夜暗。匍匐而行。趣齋供。所以前施物。遙擲衆中。十餘粒米。別奉炊飯。因發願曰。女人窮業。久自種得。竭貧行施。用希來報。輒以十餘黃米投飯甑中。必若至誠。貧業盡者。當願所炊之飯。變成黃色。如無所感。命也。柰何。作此擔已。掩淚而返。於是甑中五石米飯。並成黃色。大衆驚嗟。未知所以。周尋緣構。乃云。田遺生女之願力也。齋會齊率。獲粟十斛。尋用濟之。安辦法衣。仍度華嚴。送入京寺。嘗於龕側。村中縛猪三頭。將加烹宰。安聞往贖。社人恐不得殺。增長索錢十千。安曰。貧道見有三千。已加本價十倍。可以相與。衆各不同。更相忿競。忽有小兒。裹腹來至。社會助安贖猪。既已諍競。因從乞酒。行飲行舞。焜煌旋轉。合社老少。眼並失明。湏臾自隱。不知所在。安即引刀自割胠肉曰。此彼俱肉耳。猪食糞穢。爾敢之。況人食米。理足貴也。社人聞見。一時同放。猪既得脫。繞安三匝。以鼻喙觸。若有愛敬。故使郊之南西五十里內。雞猪絕嗣。乃至于今。其感發慈善。皆此類也。以大業五年十一月五日。終于靜法禪院。春秋八十。

道英

釋道英。姓陳氏。蒲州猗氏人也。幼從姊休律師出家。至并州。依炬法師學道。後入禪定。稍呈異迹。大業中。嘗任直歲。與俗爭地。遽鬪不息。使語彼云。吾其死矣。忽然倒仆。如死之僵。諸俗同評。道人多詐。以針刺甲。雖深不動。



氣絕色變。將欲洪胖。傍有智者。令其歸命。誓不敢爭。願還生也。尋言起坐。語笑如常。又行龍臺澤池側。見魚之遊。乃曰。吾與汝共爭。我何者為勝。汝不及我。我可不及汝耶。即脫衣入水。弟子持衣守之。經十六宿。比出告曰。雖在水中。唯弊土空我耳。又屬嚴冬。冰厚雪壯。乃曰。如此平淨之處。何得不眠。遂脫衣仰卧。經于三宿。乃起而言曰。幾被火炙殺我。晚還蒲州。住普救寺。晝則厲眾僧勤事。夜則跏坐。為說禪觀。時或弊其勞者。聞法不覺其疲。一日說起信論。奄然不語。恠往觀之。氣絕身冷。眾知滅想。即而任之。經于累宿。方從定起。時河東道遜。高世名僧。素與同學。及遜捨命去。英百五十里。未及相報。終夕便知其死。其知微通感如此。及終前夕。集眾告曰。早須收積。明日間多聚人畜。損食穀草。眾不測其言。英亦自運。催促甚急。至夜都了。索水剃洗。還本坐處。被以大衣。奄然神逝。

### 法進

釋法進。不知氏族。住益州綿竹縣響應山玉女寺。為輝禪師弟子。後於定法師所受十戒。恭謹精誠。謙恪為務。唯業坐禪。寺後竹林。常於彼坐。有四老虎。繞於左右。師語勿泄其相也。後教水觀。家人取柴。見繩床上有好清水。拾兩白石。安著水中。進暮還寺。彌覺背痛。問其家人。云。安石子。語令明往。可除此石。及旦進禪。家人還見如初。清水即除。石子所苦便愈。因爾習定。不出此山。開皇中。蜀王秀臨益州。妃患心腹。諸治不損。有綿州昌隆白



崖山道士文普善者。能昇刀焚火。鵠鳴山有二道士。能呼策鬼神。符印章醮。入水不溺。並來同治。都無有効。乃使長史張英等往山。請出為妃治病。報曰。吾在山住。向八十年。與木同性。徐更苦邀。進答曰。盡命於此。可自早還。信返具報。主使六司官人。犢車四乘。將從百人。重往迎請。進曰。王雖貴勝。命有所屬。執志如初。信還。王大怒。自入山。將手加罪。既至山寺。禮佛見進。不覺身戰汗流。王曰。奉請禪師。為妃治病。禪師慈悲。願救此苦。答曰。殺羊食心。豈不苦痛。一切衆生。皆是佛子。何因於妃。偏生此愛。王慙愧懺悔。仍請出山。乃曰。王命既重。不可不行。王自先行。貧道生不乘騎。當可後去。王曰。弟子步從。與師同行。報曰。出家人與俗異。但前行。應同到。王行兩日。方至。進一旦便達。往入妃堂。妃見進流汗。因爾除差。施絹五百段。納衣架。染什物等。進令王妃以水盥手。執物呪願。搃用迴入法聚寺。基業即辭還山。王與妃見進。足離地可四五寸。以大業十三年正月八日。終此山中。龍吟猿叫。三日乃已。

### 僧朗

釋僧朗。一名法朗。俗姓許氏。南陽人。年二十餘。欣欲出家。尋預剃落。栖止無定。多住鄂州。飲馔同俗。為時共輕。常養一猴一犬。其狀偉大。皆黃赤色。不狎餘人。唯附於朗。日夕相隨。未曾捨離。若至食時。以木盃受食。朗取飽已。餘者用飼之。既同器食訖。猴便取盃戴之。騎犬背上。先朗而行人。有奪者。輒為所咋。朗任犬盤遊。略無常度。



陳末隋初。行於江嶺之表。章服麗弊。威儀越序。杖策徒行。護養生命。時復讀誦諸經。偏以法華為志。素乏聲弄。清靡不豐。乃潔誦之。一坐七遍。如是不久。聲如雷動。知福力之可階也。其誦必以七數為期。乃至七十。七百。七千。逮于七萬。聲韻諧暢。任縱而起。其類箏笛。隨發明了。故所誦經時。傍人觀者。視聽皆失。朗唇吻不動。而轉起咽喉。遠近亮徹。因以著名。然臂脚及手。伸縮任懷。有若龜藏時。若肉聚。或住酒席。同諸讌飲。而嚼噍猪肉。不測其來。故世語曰。法華朗。五處俱時縮。猪肉滿口頰。或復巡江洄泝。拱手舟中。猴犬在傍。都無艤棹。隨意所往。雖陵犯風波。瞬息之間。便達所在。有比丘尼為鬼所著。超悟玄解。說辯經文。居宗講道。聽探雲合。皆不測也。莫不讚其聰悟。朗聞曰。此邪鬼所加。何有正理。須後檢校。他日清旦。猴犬前行。徑至尼寺。朗往到禮佛繞塔。至講堂前。尼猶講說。朗乃厲聲呵曰。小婢。吾今既來。何不下座。此尼承聲崩下。走出堂前。立對於朗。從卯至申。卓不移處。通汗流地。默無言說。問其慧解。奄若聾瘖。百日已後。方復本性。其降行感通。皆此類也。大業末卒。

惠祥

釋惠祥。姓周氏。十五出家。頭陀乞食。默自禪誦。不與眾同年。十九染患。三月救療無徵。夜中宴坐。歎曰。大丈夫本欲以身從道。於末法中。摧伏非法。如何此志未從。為病所困。將曉。有一人長丈餘。謂曰。但誦涅槃。無愁不羸。至旦即誦。三日便瘳。大業末夏中。因食。口中得舍利。不



辨棄地輒還在口。如是數四。疑是真身。砧槌不碎。遂聲  
鍾告衆。白黑咸集。祥涕泣焚香。願降威力。須臾放五色  
光。異香遍郭。衆覩希有。體貌肥白。可長八尺有餘。行路  
不識。莫不恠仰。刺史李昇明至寺。恠異。謂群官曰。此道  
人。膚容若此。日可應。敢一羊。語訖。覺手足不隨。乘馬失  
御。諸官以實告之。便悔謝還復。大使權茂行至鄧州。又  
恠昇明曰。此大德非凡。具說往緣。茂不信。請將七日。試  
以麤食。而膚色更悅。茂愧伏。悔先不信之罪。將終。手執  
經。胡跪。謂弟子曰。吾今逝矣。汝好住持。無令絕滅。又感  
異香盈郭。以大業末年八月卒。春秋七十。氣命雖絕。而  
胡跪執經如初。遠近奔赴。見其卓然。無不歎訝。

無相

涪州相思寺無相禪師者。非巴蜀人。不知何來。忽至山  
寺。隨衆而已。不異恒人。其寺在涪州上流。大江水北崖  
側。有銘方五尺許。字如掌大。都不可識。下有佛迹。相去  
九尺。長三尺許。踏石如泥。道俗敬重。相以一時渡水。齊  
返。無船。乃鉢安水中。曰。何為常擊汝。汝可自渡水。便取  
芭蕉搭水。立上而渡。鉢隨後來。須臾達岸。時採樵者見  
之。相語覺知。已便辭去。徒衆苦留不住。至水入船。諸人  
禮請不與。篙楫乃捉船舷。直尔渡水。不顧而去。即令尋  
逐。莫測所在。

明恭

釋明恭住鄭州會善寺。其力若神。嘗山行見虎。猪交鬪。  
猪漸不如。恭語虎曰。可放令去。虎不肯恭。以一手捉頭。



一手撮尾擲之山下。又以僧衣置磔下。僧怪之。恭笑為捧柱取衣。大業末賊起抄掠。令其寺辦數十人大猪。食具恭延賊食。賊讓恭先恭乃鋪餅數十。安猪啖之。須臾食盡。賊眾驚伏。恭召為護寺檀越。群賊許之。故隋唐交軍。其境絕賊往來。恭之力也。

### 曇詢

釋曇詢。姓楊氏。弘農華陰人。後遷宅于河東郡焉。年二十。方捨俗事。遠訪巖隱。遊至白鹿山北林落泉寺。逢曇准禪師。而蒙剃髮。後經三夏。移住鹿土谷脩禪。屬枯泉重出。鹿麋繞院。故得美水馴獸。日濟道隣。從學之徒相慶茲瑞。時因請法。暫往雲門。值徑陰霧昏。便成失道。賴山神示路。方會本途。時有盜來竊蔬菜。將欲出園。乃為群蜂所螫。詢聞來救。慈心將治。得全餘命。嘗有趙人遠至。慇懃致禮。陳云。因病死。復蘇。得見闍王。詰問罪當就獄。賴有曇詢禪師來為請命。王因放免。特來禮謝。又山行。值二虎相鬪。累時不歇。詢乃執錫分之。以身為翳。語云。同居林藪。計無大乖。幸各分路。虎低頭受命。便飲氣而散。屢逢熊虎交諍。事略同此。而或廓居榛梗。唯詢一蹤。入鳥下亂。獸見如偶。每入禪定。七日為期。白虎入房。仍為窟宅。獨處靜院。不出十年。自有禪蹤。斯人罕擬。初遘疾。弥留。忽有神光照燭。香風拂扇。又感異鳥。白頸赤身。繞院空飛。聲啾哀切。氣至大漸。鳥住堂基。自後狎附。不畏人物。或在房門。至于卧席。悲叫逾甚。血沸眼中。既尔徃化。鳥便飛出外空。旋轉奄然翔逝。又感猛虎。



遠院悲吼。兩宵雲昏。三日天地結慘。又如山崩石墜。林摧澗塞。驚發人畜。栖遑失據。其哀感靈祥。未可殫記。後以武德五年十二月。弟子靜休道願。慧方等。乃闍毗餘質。建塔立碑焉。

### 智滿

釋智滿者。俗姓賈氏。不知何許人也。戒行高潔。居于安樂寺。時唐太宗在晉陽。與劉文靖首謀之夜。高祖夢墮牀下。又見遍身為蟲蛆所食。意甚惡之。諮詢於滿。滿曰。此可拜賀也。夫牀下者。所謂陛下也。群蛆食者。所謂群生共仰一人活耳。高祖嘉其言。又云。貧道頗習易。以卦之象。明夷之兆。按易曰。巽在牀下。紛若無咎。而早吉晚凶。斯固體大不可以小。小則敗。大則濟。可作大事。以濟群生。無往不亨。乃必成乎。高祖動容曰。雖蒙善誘。未敢當仁。師眇太宗曰。郎君與大人並叶兆。夢是謂幹父之蠱。考用無咎。天理人事。昭然可知。不可固拒。天之與也。天與不取。必受其咎。無乃不可乎。高祖拜而謝曰。弟子何幸。再煩鄭重叮嚀之意。敢不敬從。滿後不知所終。

### 智晞

釋智晞。俗姓陳氏。潁川人。年二十始獲從願。一得奉值。即定師資。律儀具足。稟受禪訣。加脩寂定。常居佛隴。脩禪道場。樂三昧者。咸共歸仰。宴坐之暇。時復指搗創造伽藍殿堂房舍。悉皆嚴整。唯經臺未構。始欲僦工。有香鑪峰。山巖峻嶮。林木秀異。然彼神祇。巨有靈驗。自古已來。無敢視其峯崖。况有登踐而採伐者。時衆議曰。今既



營經臺。供養法寶。唯尚精華。豈可率尔而已。其香爐峯  
檉栢木中精勝。可共取之。以充供養。論詳既訖。往諮於  
晞。具陳上事。良久。答云。山神護惜。不可造次。無敢重言。  
各還所在。爾夜夢人送疏云。香爐峯檉栢樹。盡皆捨給  
經臺。時有僧法雲。欲往香爐峯頭陀。晞諫曰。彼山神剛  
強。御道力微弱。向彼必不得安。慎勿往也。雲不納。旨遂  
往。到山。不盈二宿。神即現形。驅雲令還。自陳其事。方憶  
前旨。深生敬仰。有弟子道亘。在房誦經。自往喚云。今晚  
當有僧來。言竟。仍向門下。即見一僧。純著納衣。執錫持  
鉢。形神爽俊。有異常人。從外而來。相去二十餘步。繞入  
路東。隱而不現。俄頃之間。即聞東山有鍾鼓聲。大音震  
谷。便云。噫。喚吾也。未終數日。語弟子云。吾命無幾。可作  
香湯洗浴。適竟。山中鳥獸異色。殊形常所不見者。並皆  
來集房側。覆地騰空。悲鳴喚呼。絃日方散。以貞觀元年  
十二月十八日午時。結跏安坐。端直儼然。氣息綿微。如  
入禪定。因而不返。時虛空中有絃管聲。合衆皆聞。良久  
乃息。經停數日。方入石龕。顏色敷悅。手足柔軟。不異生  
平。春秋七十有二。

惠主

釋惠主。俗姓賈氏。始州永歸縣人。六歲出家。為斌法師  
弟子。於黃安縣造寺七所。梓潼縣造十寺。武連縣造三  
寺。初年登冠。欲受具足。當境無人。乃入京。選德於甘露  
寺。受戒。唯聽四分。餘義傍通。夢見三日三夜。天地闇冥。  
衆生無眼。過此忽明。眼還明淨。覺已汗流。一百日後。周



毀經道。方知徵應。即返故鄉。南山藏伏。唯食松葉。異類禽獸同集。無聲。或有山神送茯苓。甘松香來。獲此供養。六時行道。禽獸隨行。禮佛誦經。似如聽仰。仍為幽顯。受菩薩戒。後有獼猴群。共治道。主曰。汝性躁擾。作此何為。曰。時君異也。佛日通也。深怪其言。尋尔更有異祥。龍飛獸集。香氣充山。其類衆矣。後有八人。採弓材者。甚大驚駭。便慰主曰。聖君出世。時號開皇矣。即將出山。以事奏聞。蒙預出家。大業中。勅還本州香林寺。常弘四分為業。武德之始。陵陽公臨益州。素少信心。將百餘獸物。行至始州。令於寺內講堂。佛殿僧房。安置無敢違者。主從莊還。見斯穢褻。即入房中。取錫杖二衣。出歎曰。死活今日矣。舉杖向驢騾。一時倒仆如死。兩手各擎一獸。擲棄坑中。州縣官人驚怖。執主狀。申陵陽大喜。一無所怪。書曰。弟子數病。不逢害鬼。蒙得律師破慳貪袋。深為大利。今附沉香十斤。細綾十段。仰贈。後還京日。從受菩薩戒焉。貞觀三年。寺有明禪師者。清卓不群。白日獨坐。見無半身。尚衆述曰。吾與律師建立此寺。兩人同心。忽失半身。將不律師先去。不者明其死矣。尋尔午時。主便無疾而逝。春秋八十九。

明淨

釋明淨。高密人。少出家。味定為業。後南遊東越。天台諸山。禪觀在懷。無緣世習。而衣服縷縷。動止適時。同侶禪徒。未之弘仰。山粒致絕。日至村中。每從乞食。賫還中路。值於群虎。皆張口閉目。若有飢相。淨曰。吾經行山澤。多



矣。肅兒無心畏之。今列于路傍。豈非為食耶。乃以匙抄飯內。其口中餘者對而散盡。告曰。知來食少。輒濟自他。殊不副懷。深用多愧。明日乞食。肅又如前。嘗值亢旱。苗稼並枯。淫祀之流。妄祈邀請。雖加懇側。終不能致。淨曰。可罷諸邪禱。吾獨能降。遂結齋靜室。七日平旦。雲布雨施。高下滂注。百姓利焉。貞觀三年冬。至于四年夏。六月無雨。天子下詔。岳瀆諸廟。普令雩祭。於時萬里赫然。全無有應。有藩侍郎者。曾任密州。知淨能感。以狀奏聞。勅召至京。令住祈雨。告以所須。一無損費。唯願靜念三寶。慈濟四生。七日之後。必降甘澤。乃於莊嚴寺靜房禪默。至七日向曉。問守衛者曰。天之西壯。應有白虹。可試觀之。尋聲便見。淨曰。雨必至矣。頃臾雲合。驟雨忽零。比至日晡。海內通洽。遂以有年。勅乃撻度三千僧。用酌淨德。其徵應難思。厥相叵測。但以京輦誼襍。性不狎之。請還本鄉之義勝寺。山居繼業。竟不測其存沒云。

智瓌

釋智瓌。俗姓張氏。清河人。年二十二。二親俱逝。慘服纒釋。使染疾病。經歲月。醫藥無効。仍於靜夜策杖。曳疾出中庭。向月而卧。至心專念。月光菩薩。唯願大悲。濟我沉痾。如是繫念。遂經旬朔。於中夜間。忽夢見一人。形色非常。從東方來。謂瓌曰。我今故來為汝治病。即以口就瓌身。次第吸嗽。三夜如此。因尔稍痊。遂求離俗。投安靜寺。慧憑法師。以為弟子。間智者執行。起羣為世良導。即泛舸豐流。直指台岫。伏膺受道。乃遣行法華懺悔。第二七



日初夜懺訖。還就禪床。如欲安坐。仍見九頭龍從地湧出。上昇虛空。明旦詔白。噪云。此是表九道衆生。聞法華經。將來之世。破無明地。入法性空。陳至德四年。永陽王伯智作牧仙都。延屈智者來于鎮所。噪隨師受請。同赴會稽山。九旬坐訖。仍即辭王。住寶林山寺。行法華三昧。初日初夜。如有人來搖動戶扇。噪問之。汝是何人。夜來搖戶。即長聲答云。我來看燈。爾頻經數過。問答如前。其寺內先有大德慧成禪師。夜具聞之。謂弟子曰。彼堂內從來有大惡鬼。今聞此聲。必是鬼來取人也。天將欲曉。成師扣戶而喚。噪未暇得應。便繞堂唱云。苦哉苦哉。其人了矣。噪即開戶問意。答云。汝猶在耶。吾謂昨夜鬼已害汝。故此嗟耳。第二日夜。鬼入堂內。捉壁打柱。周遍東西。堂內六燈。噪即滅五留一。行道坐禪。誦經坦然。無懼於三七日中。事恒如此。行法將訖。見一青衣童子。稱讚善哉。言已不見。噪又因事出往會稽。路由剡縣。孝行村乞食。主人誤煮毒葷。設噪食。竟進。趣前途。主人於後。敢此餘殘。並皆吐痢。若死等苦。隣人見之。即持藥追噪。十里方及。見噪快行無恙。問曰。何故見尋。具陳上事。便笑而答曰。貧道無他。可棄藥。反蹤不須見。逐以貞觀十二年卒於寺。春秋八十三矣。

知苑

幽州沙門知苑。精練有學識。隋大業中。發心造石字一切經藏。以備法滅。既而於幽州西山鑿巖為石室。即磨四壁。而以寫經。又取方石。別更磨寫藏諸室內。每一室



滿。即以石塞門。鎔鐵錮之。時隋煬帝幸涿郡內史侍郎蕭瑀。皇后弟也。性篤信佛法。以其事白后。后施絹千匹。瑀施絹五百匹。朝野聞之。爭共捨施。故苑得以成功。苑常以役匠既多。道俗奔湊。欲於巖前造木佛堂并食堂。寢室。而念木瓦難辦。恐繁經費。未能起作。忽一夜暴雨。雷電震山。明旦既晴。乃見山下有大木松柏數千萬。為水所漂。積於道次。道俗驚駭。不知來處。於是遠近歎服。苑乃使匠擇取其木。餘皆分與邑里。邑里喜愧而助造。堂宇頃之畢成。如其志焉。苑所造石經已滿七室。以貞觀十三年卒。弟子猶繼其功焉。

大志

僧大志。會稽顧氏子。發蒙出家。師事天台智者。智者見

其形神洒落。高放物表。取名大志。誦法華經。索然閑靜。音聲清轉。聽者忘疲。後於廬山甘露行頭。施行。有時投身猛獸。彼皆避去。食粒若盡。惟以餅果繼命而已。如是七載。禪誦不休。晚住持福林寺。會大業中。屏除佛教。慨大法陵遲。遂身著孝衣於佛堂中。慟哭三日。誓捨形骸。申明正教。即往東都上表曰。願陛下興隆三寶。貧道當然一臂於嵩岳。用報國恩。帝許之。遂設大齋。七衆通集。師絕糧三日。登大棚中。布裹其臂。灌之以蠟。如炬燃之。光照巖岫。晃然大明。衆見苦行。痛入心髓。而志形色不變。或誦經文。或讚佛德。或為衆說法。聲聲不絕。燒已下棚。跏趺入定。七日而卒。

智聰



僧智聰住揚州白馬寺專習三論尋渡江住安樂寺值隋國亡思歸無計隱江荻中誦法華經七日不飢恒有四帛馴遶聰曰吾已十日不食命在呼吸間卿可食之帛作人語曰造立天地無有此理忽見一老翁腋下挟一小船來曰師欲渡江即上船其四帛見而淚出聰曰持危拔難正在今日即同四帛利涉南岸船及老人忽然不見聰領四帛止棲霞塔西徑行禪誦誓不寢卧安衆八十餘人若有凶事帛來大吼由此警覺貞觀中年九十九於佛生日熏爐徧禮聖像還歸靜室端坐而化

善道

善道法師臨淄人入大藏信手探卷得觀無量壽佛經乃專心念佛以脩十六妙觀及住廬山觀遠公遺躅豁然增思後遁跡終南脩般若舟三昧數載睹寶閣瑤池宛然在目復往晉陽從綽禪師授無量壽經入定七日結請觀所生處道報曰師當懺悔三罪方可往生師嘗安佛像在簷牖下自處深房此一罪也當於佛前懺又常後使出家人此二罪也當於四方僧前懺又因造屋多損虫命此三罪也當於一切衆生前懺綽靜思往咎洗心悔謝久之道因定出謂綽曰師罪滅矣後有白光來照之時是往生相也道行化京師歸者如市忽微疾即掩室怡然念佛而逝異香天樂向西而隱

神僧傳卷第五







